

Allannguutissatut siunnersuutit

Uunga:

Inissiani attartortittakkani akiliutitut tapiissutit pillugit Inatsisartut inatsisissaanut nr. xx., xx.xx 2015-imi allannguutissatut siunnersuutit:

Pingajussaaneerinninnissamut Naalakkersuisut saqqummiussaat.

§ 5-mut

1. § 5 imatut isikkoqalissaaq:

§ 5. Inissiani attartortittakkani akiliutitut tapiissutit inigisamut akiliutit annertussusaat, najugaqatigiillu tamakkiisumik isertitarisaat aammalu inissiap pissuserisaa naapertorlugit taamatullu najugaqatigiinni 18-t inorlugit ukioqartut amerlassusaat naapertorlugit aalajangersaavigineqartarput. Pensionisialimmut tunngatillugu taasumap isertitarisaanit 4.100 kr.-nit ilanngaatineqartassapput.

Imm. 2. Inissiani attartortittakkani akiliutitut tapiissutit pissarsiarineqarsinnaanissaanut aammalu akiliutip malunnaatilimmik allangortussaananeranut, najugaqatigiit isertitarisaasa malunnaatilimmik allangorsimanerannut, inigisap pissuserisaata allangortinneqarneratigut imaluunniit meeqqat 18-t inorlugit najugaqartut amerlassutsimikkut allangornerannut tunngatillugu tamatuma kingunersaanik akiliutitut tapiissutit tamakkiisumik isertitariligassat toqqammavigalugit nutaamik naatsorsorneqartassapput.

Imm. 3. Meeqqat angerlarsimaffimmi najugaqartut ilanngullugit naatsorsuiffigineqartarnerat pissaaq qaammatip taasumap 18-liiffissaa naanissaa tikillugu. Kommunimut nalunaaruteqareernerup kingorna meeqqat 18-t inorlugit ukiullit naatsorsuinermit ilanngunneqassapput nalunaaruteqarnermit qaammatip tulluuttup aallaqqaataanniit.”

Inatsisissatut siunnersuummut oqaaseqaatit

Nalinginnaasumik oqaaseqaatit

Inissiani attartortittakkani akiliutinut tapiissutit pillugit Inatsisartut inatsisissaatut siunnersuut siullermeerneqarpoq ulloq 8. oktober 2015-mi. Siullermeerneqareerneqarata malitsigisaannik siunnersuut Ilaqutariinnermut Peqqissutsimullu ataatsimiititaliamut suliaakkiissutigineqarpoq. Siullermeerneqarnerata aappassaaneerneqarneratalu akornanni politikkikkut oqallinnerit toqqammavigalugit Naalakkersuisut siunnersuummut allannguutissamik siunnersuuteqarsimapput. Ilaqutariinnermut Peqqissutsimullu ataatsimiititaliap aappassaaneerinninnissamut isumaliuutissiissusertik suliarisimavaat.

Inatsisissatut siunnersuusiorderup pinerani Utoqqalinermi pensionisiat aammalu Siusinaartumik sulisinnaajunnaarnersiutit pillugit suliarinninnerit ataqatigiissarneqarsimapput. Taamatut suliaqarnermi naliliiffigineqarsimavoq siunnersuutit pingajussaaneerneqarnissaanut atatillugu allannguutissamik siunnersuusiorderoqartariaqartoq, tamatumani erseqqissaassutiginiarlugu ”massakkut isertitarisat” qanoq paasineqartariaqarnersoq aammalu aalajangersakkani ataasiakkaani oqaaseqatigiit atorneqarsimasut ersarissaavigineqarsimallutik.

Allannguutissatut siunnersuusiordermi § 5-ip ilusimigut ersarissaavigineqarnissaa siunertaralugu allanngortinneqarsimavoq.

Tamatumani ilanngunneqarsimavoq taaguutip ”massakkut isertitarisat” nalinginnaasumik nassuiaatini ersarissaavigineqarnissaa.

Allannguutissatut siunnersuuteqarnerup kingunerisaanik aningaasatigut allaffissornikkullu toqqammaviliussat allannguuteqartinneqanngillat.

Massakkut isertitarisat

Allannguutissatut siunnersuuteqarnermi erseqqissaassutigineqarpoq *massakkut isertitarisat* qanoq paasineqassanersoq.

Massakkut isertitarisat tassaapput A-tut B-tullu isertitarisat nalinginnaasumik ilanngaatit peerlugit. Massakkut isertitarisani isiginiarneqanngillat DIS-mit GIS-imillu akileraarutissaqanngitsutut isertitarineqartartut.

Nalinginnaasumik nassuiaatinut immikkut oqaaseqaatit

Nr. 1-mut

Imm. 1-mut

Aalajangersakkami pineqarpoq qanoq iliorluni inigisamut attartortittakkamut akiliutitut tapiissutit naatsorsorneqassanersut. Naatsorsuinermi toqqammavigineqassapput inigisamut akiliut, illoqatigiit tamakkiisumik isertitarisaat, inissiap taasumalu pissuserisaa aammalu meeqqat 18-t inorlugit ukiullit qassit angerlarsimaffimmi najugaqarnersut. Pensionisiallit tassaapput utoqqalinermi pensionisiallit aammalu siusinaartumik sulisinnaajunnaarnersiutillit. Taakkua pineqartillugit 4.100 kr.-nit nalinginnaasumik isertitarisat naatsorneqarneranni pensionisialimmut ataatsimut ilanngaatineqartassapput.

Inigisatut pineqartup aammalu taasumap pissuserisaa pillugit aalajangersakkat nalunaarusiornikkut nassuiaasiorneqassapput. Tamatumuuna ineqarnermut tapiissutit, aammalu assersuutigalugu ineqarnermut akiliutitut tapiissutinik pissarsiaqartup ilaqtariinnermut aningaasatigullu attuumassuteqarsinnaaneranut tunngatillugit killiliinissat, tamatumani apeqqutaatillugit tapiissutinik pissarsiaqartartup attartornissamut isumaqatigiissuteqarsimanera taasumalu pissuserisai ilanngullugit aalajangiisuutinneqarumaarput. Inigisap pissuserisaannut piumasagaatinut tunngatillugu, assersuutigalugu qanoq tapiissutit annertussuseqarsinnaaneritut aalajangersaanissat toqqammavissaqartinneqalissapput.

Imm. 2-mut

Aalajangersagaq oqaasertamigut allannguallatsinneqarnikuuvoq pineqarlunilu inigisamut attartukkamut tapiissutinik pissarsisinnaassagaani aammalu toqqammaviusut malunnaatilimmik allannguuteqarsimassappata, taava attartornermi akiliutitut tapiissutit nutaamik tamakku toqqammavigalugit nutaamik nalilersuiffigineqartassapput, tamatumanili aamma toqqammavigineqassallutik siunissami isertitarisassatut naatsorsuutigineqartut.

Inigisamut akiliutitut tapiissutit tunniunneqartalerneritut aammalu toqqammaviusut allannguuteqarujussuarnerisigut isertitariligassat toqqammavigitinneqartassapput. Inigisamut akiliutitut tapiissutit tunniunneqartalernissaanut tunngatillugu aammalu malunnaatilimmik allannguuteqartussaatiillugu nalinginnaasumik isertitarisat allannguuteqarnerat pisimasuusarput, taamaasillunilu qinnuteqaqqaarnermi toqqammavigineqarsimasut pissusiviusunik ersersitsisutut taaneqarsinnaajunnaarsimassallutik. Taamaattumik siunissami isertitarineqartussat pingaartillugit aalajangersaasoqartassaaq.

Ineqarnermut akiliutitut tapiissutaasartut tunniunneqarnissaanut pissutsit malunnaatilimmik allanngorsimatillugit ataasiakkaarlugit nalilersorneqartussaapput. Malunnaatilimmik

allannguutaasinnaapput assersuutigalugu najugaqatigiit amerlassutsimikkut allannguuteqarsimanerat, illoqatigisat attuumassuteqarnerisa suliffeqarnermut attuumassuteqarnerisa allannguuteqarsimanerat imaluunniit ineqarnermut akiliutip allannguuteqarsimaneranik.

Imm. 3-mut

Aalajangersakkatigut naqissuserneqarpoq meeqqat 18-t inorlugit najugaqatigineqartut amerlassutsimikkut allannguuteqarsimanerat kommunimut nalunaarutigineqarneriniit qaammatip tulliata aallaqqaataanniit naatsorsorneqartalissallutik. Aalajangersagaq imatut paasineqassaaq kommuni innuttaasumit ilisimatinneqarsimasinnaammat imaluunniit kommunip pisinnaatitaanini naapertorlugu nammineerluni cpr-itigut allattorsimaffiit allaluunniit allatigut misissuinikkut allanngortoqarsimasoq paasisaqarfigisimaguniuk.